

խօսում էին մի լեզու եւ այդ լեզուն հայերէն էր :

Եթէ չենք ուզում թեթեւամտօրէն արհամարհել այս զրոյցները, որպէս անարժէք եւ մտացածին առասպելներ, ապա պէտք է ընդունենք, որ նրանք պատմական յայտնի շրջանի ոչ միայն գաղափարական որոնումների, այլ եւ իրական հասումների արձագանգ են :

Այդ շրջանը Բագրատունեաց դարն է :

Բագրատունի կորովի գործիչներն էին, որ հարթեցին, պատրաստեցին այն հողը, որի վրայ իրաւ կարող էին բողբոջել կովկասեան եղբայրակցութեան սերմերը եւ նրանց ձայնատու եւ գաղափարախօս զրոյցները :

Սակայն, կրօնական եւ Փէոդաւական խրամատները, որ ինքնին բարեբաստիկ չեն պետական խոչոր կազմակերպութեանց, դառնում են որոշ պայմաններում պայթուցիկ նիւթ ամէն մի հաւաքարար գործի համար : Բիւզանդ

եւ Արար յօշոտիչ քաղաքականութիւնը բորբոքեց դաւանական կրքերը, խրախուսեց ինքիշխանութեան անջատիչ տենչերը եւ ցրեց դարաւոր ճիգերի արդիւնքը, խափանելով գլուխ բերել քաղաքական մեծ շէնքը : Այն թագերը եւ կամ կիսաթագերը, որ ամիրապետները բաշխում էին Բագրատունի թէ այլ իշխաններին եւ կայսրները ողջունում, իրապէս այլ խորհուրդ չունէին քան արգիլել, խանդարել իսկական թագի երեւումը : Թագերը դարձան անջատ ուղիների գլխաքարեր :

Բագրատունեաց փորձը՝ ընդգրկել համայն Կովկասը, ինչպէս մի մեծ ընտանիք, մի քաղաքական կենսակցութեան շաղկապի մէջ, ներկայանում է մեզ որպէս մի խիզախում՝ գաղափարական լայնութեամբ անօրինակ միջնադարեան նեղսիրտ միջնորոտում եւ կազմում է այս նշանաւոր տոհմի պատմական փառքը :

(Վերջ)

